

ЛҮИМА СЭРИПОС

18 апреля
2019 года
№8
(1194)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года



С. Ромбандеева вѣрум хури

Ты хурит мѣньци нѣ Марина Сергеевна Вынгилева пѣслым ълы. Ягрим пѣвѣлт сѡсса мѣхум мѣгыс пѣс щирѣл сакныл хартнѣ ханѣцтап вѣрыглавес. Мѣньци нѣт тув сѣв мѣныл ѣхталасыт, хѣрум хѣтал щаквѣсѣсѣт. Ты ѡвѣлтыт 8-9 лѡпсыт ловиньтѣн.

Ты
номерт
ЛОВИНЬТѢН:

Нѣлок-олн
ойтуңкве
ялѣн

2

Ёсал хѣйтуңкве
сѣв мир
ѣхталас

4

Пѣс щирѣл
сакныл
хартсыт

8-9

Нѣврамыт
«Ўринѣква
хѣтал»
янытласыт

11

Вѡраян хумыт
нѣрытыт
яласѣгыт

16

ЛЯХХАЛЫТ

Нәлок-олн ойтуңкве ялән

Югравт мирныл нәлок-олн атнә мāt рӯпитан кӯщай нә Ольга Литова ляххал тотнә колн ёхталас. Тав маҳум мағыс хўлтнә латың кётыс. Касың тәл элүмхóлас такви нупылэ хансум колэ, машинатэ мағыс ос рӯпататэныл олн вос ойты. Ань ты тәл эрнэ нәпакыт маныр мағыс ос хунь миңкве эрэгыт, тав ты урыл потыртас.

Молты тәл рӯпатаныл коньпал мот мāt олн сәлум хотпат яныгполь этпос оигпан мус декларация-нәпакт хасхатуңкве лаввёсыт. Ты вәрмалы тәл котиль этпосныл овылтахтыс. Ойтгур этпос мус маҳумн яныгтэйт ойтхатуңкве эри. Хот ос мансавит олн сәлсын, тыммағыс нәпаканын олнә манынт маён.

Касың хотпа рӯпататэйт олныл ойтаве. Тот кӯщайт нән сәлум олнаыныл акв мәнә охсатэ ты 13% тәра бюджетын ойтэгыт. Ты хосыт округувт савсыр тәлат мусхал щирыл щёпитавет.

Маныр мағыс ойтхатуңкве эри

Щар овлэт тамле вәрмалы мағыс олн атаве. Хотпа такви матыр рӯпата вәри ке, тыммағыс тавән ойтхатуңкве ты эри. Тувыл китыт тәла, элүмхóлас колэ манос машинатэ тыналаме хосыт олн сәлыс ке, тав ос ойтхатуңкве лававе.

Хотпа тыналан колэ ос машинатэ хурум тәл иң ат ке оныщистэ, тавәныл нәлок-олн пуваве. Ос тыгыл арыгнув тәл ошсанэ ке, тав декларация-нәпак хансуңкве ос ойтхатуңкве арыгтапаве.

Хурмит вәрмалы щирыл, хотпа мот хон маныл матыр рӯпата мағыс олн сәлыс ке, тыммағыс ос олнпот ойтункве лававе. Армият лусытан манос рӯ-

пататэ хосыт мот хон мән кётыгләлнэ хотпат тув ат патэгыт.

Нилыт вәрмалы щирыл, элүмхóлас лотерейный билетыл ёнгиматэ матыр олн ликмалтан порат ос ойтхатуңкве яртаве. Ёнгим сәв олн винэ порат, тувыл тәра олн пуваве. Ос 15 сөтыра солкóви мус сәлсын ке, тонт нәнки ойтхатуңкве лававән. Тувыл ос пòх хотпаныл хотты муйлупса винән мағыс манос колыл ке муйлуптавән, та порат ос олнпот ойтункве паттавән.

Наукат ос литературат нәнки матыр номт тотсын манос хассын ке, нәпак тәратасын, тыммағыс ос ойтхатуңкве эри. Ос ляпа рӯтныл опа-щашёкваныл, щәнә-ащныл, каңк-увщиныл, аги-пыгныл матыр муйлупса выгын ке, тувыл нәлок-олн ойтункве ат эри, туп пòх хотпаныл виве. Тох ёмты, онып манән олнә кол муйлупты ке, ты кол мансавит тынә олыс, мане тувыл олнпот ойтункве паты.

Ощмарлаңкве ат әртми

Тованакт маҳум нәлок-олн мощчанув ойтнә мағыс коланыл тыналан порат тынә мощцаг декларация-нәпак хансыяныл. Ты ошмар мағыс Государственный Думат сәккон пирмайтавес. Ань хотьют арген мощца тынә нәпакн



Ольга Литова

хансы, тав колэ кадас-тровый тынә щирыл ловиньтаве. Ты хосыт элүмхóлас эрнә сәвиткёмыл ойтхаты, ләпалахтыглан вәрмалы ат ёмты.

Кӯщай нә ләвме щирыл, ты вәрмалы акваг уральтым оныщаве. Тәл овылтахтын порат тән ловиньтэгыт, хотьют ос мансавит хотпа олн ойтын щирыл олэгыт. 2018 тәл сыс 38 сөтыра атсәт элүмхóлас декларация-нәпак миңкве патэгыт.

Ань ты хотал мус 8 сөтыра сәвит хотпа эрнә нәпаканыл хасаныл ос мисаныл. Тән пуссын акваёт хотпан млн. солкóви сәвит бюджетын ойтэгыт тах. Маҳум савыңпәлэ юиовыл хоталт ойтхатуңкве ёхтэгыт.

Молты тәлныл маҳум нәлок-олнаныл интернет хосыт ойтыяныл. Ты тәла тәра-паттын мағыс, тот ёмщакв хансымы олы. Тыщир сака ёмас, нәматыр тәрвит вәрмалы атим. Хотьют туйтыглахты, тән молях хонтает. Хотпа тыналан колэ Росреестр организацият хансаве. Машина тыналан порат ос автоинспекцият нәпакыт варавет.

Тувыл ты нәпакыт пуссын олнпот атнә колн кётавет.

Сәв олн ат ойтвес

Ольга Литова лавыс, ты хотал мус округувт кол ос машина ошнә хотпат халт кит млрд. солкóви иң ат ойтвес. Рӯпитан хотпат нәлок-олнаныл ойтнә вәрмалы хосыт ос сәв олн арнтаг атхаты. Округувт ты вәрмалы щирыл пуссын акваёт сәтлов арыгтем млрд. солкóви сәвит арнта ёмталы.

Касың хотпа олнпот ёмщакв ойтункве паты ке, округ бюджетув сәвми, ты олныт пуссын эрнә тәлат мағыс холтавет. Молты тәл округ бюджетын онтырсәт нупыл кит млрд. солкóви нәлок-олн ойтывлавес. Тыитныл муниципалитетн налыман нупыл кит млрд. солкóви кётыглавес.

Кӯщай нә ләвыс, яныгполь этпос 25-26 хоталыгт мир олнпот ойтнә колн ёхталаңкве вәрмэгыт. Тән тот декларация-нәпак хансуңкве нётавет тах.

Николай
МЕРОВ

ЛЯХХАЛЫТ

АГИТ ОС ПЫГЫТ ЯКУТСК ҮСТ КАССЫТ

Маньлат хөтпат ос ныврамыт Мсэлың сун ұлтта поргуңкве, ошца ййвөвыл катыт пувим кит манос ат вёрыста хайтуңкве, сәграп пәхвтуңкве, тыньщан рёпыгтаңкве, акв маньл элаль поргуңкве Якутск үст яныгпөль этпос 1-7 хөталыт акван-атхатыгласыт.

Та үст Чемпионат ос Первенство лавнэ касылыг аквторыг вәрыгләвәсыг. Россия янытыл 164 спортсменыт касуңкве тув ёхталасыт.

Мән округувныл 24 ныврамыт ос маньлат хөтпат тув ялысyt. Тән Нефтеюганский, Сургутский, Белоярский, Нижневартовский, Ханты-Мансийский, Хальүс районуныл ос Сургут, Урай, Нижневартовск ұсытныл тув вөвыглавәсыт.

Мәхмыт пуссын командат щирыл тот касыт. Хоты хөтпат шар савнүв щёс сәлың сун ұлтта порыгмасыт, сәг-

рапаныл элальнүв вуш-касасаныл, акв маньл эл порыгмасыт, та мәхмыт нөх та патсыт. «Чемпионат России» лавнэ касылт өвыл места Красноярский крайныл ёхталам мәхмыт висыт. Китыт местал мән округувныл ёхталам агит-пыгыт майвәсыт. Хүрмит места Ямал мат өлнэ хөтпат висыт.

«Первенство России» касылт Якутият өлнэ спортсменыт нөхпатсыт. Китыт местат Ямалныл өлнэ хөтпат өлсыт. Ос хүрмит места мән округувныл ёхталам мәхум висыт.

Ты касыл щирыл



ИШХИПЫҢ УГЫТ ВИМ ХУРИ

рүпитан маньщи хум Олег Хатанев тув ос ялыс. Тав ты урыл тох лавыс: «Ань йильпи правилат щирыл агит тыньщан рёпыгтаңкве ос лававет. Агиянүв өвыл щёс тох кассыт, төват ёмашакв тыньщан рёпыгтаңкве ат вёрмөгыт. Тымәгсыл китыт места висыт».

Маньщи ныврамыт Якутск үсн касуңкве ос ялысyt. Өвыл хөталэт Елена Тихонова ййвө-

выл ёт кит вёрыста хайтыс, финишн шар сартын ёхтыгпас ос өвыл места вис. Аги Хальүс район Саранпавылныл олы, Андрей Дорофеевич Филиппов тав ханищтытэ.

Мөтыт щёс тамле касыл Нижневартовский район Излучинск павылт яңк нәтнэ этпост 1-6 хөталыт тах варава.

**Людмила
ТЕТКИНА**

Хунь пенсиян миннэ мус ат тәл хульты

Ты тәлныл пенсиян миннэ пора элаль лаквтувес. Ань нәт 60 тәланыл төвлын порат ұшлахтуңкве минәгыт, хум хотпат ос 65 тәланыл порат.

Йильпи сәккон нәглум юи-пәлт, сәв хөтпа тыи-таи китапанкве таңхөгыт, таимәгыс ань Россия Пенсионный фонд кәсың мәтәт пуңкотнэ хөтпат мәхум ёт вәтихал хөнтхатыгләгыт, потыртәгыт.

Ювле хультум сәтт Ханты-Мансийск үст ляххал тотнэ хөтпат ёт округ Пенсионный фонд кол күщай нә Татьяна Зайцева, тавән нәтнэ хум Александр Стручков ос нә Ольга Турнаева, тувыл рупата минә департаментыт пуңкотнэ хум Алексей Варлаков потыртасыт. Хөнтхатыглап тох

намайлвес: «Изменение пенсионного законодательства: предпенсионеры».

Татьяна Зайцева лавме щирыл, ань тыгыл элаль хөтпа хунь пенсиян миннәтэ мус ат тәл хульты, тав предпенсионерыг лавуңкве патаве. 2019 тәлныл тох 1964-1966 тәлыт самын патум хум хөтпат лававет, нәт халт ос хотьют 1964-1966 тәлыт самын патыс.

Лүимәт өлнэ мир йильпи сәккон щирыл, хум хөтпат 60 тәл порат пенсиян минәгыт, нәт – 55 тәл. Кит ос тыгыл сәвнүв ныврам янмалтам нәт лүимәт

сәв тәл рүпитасыт те, 50 тәлт пенсиян паттавет. Вөраян ос хұл алышлан хум хөтпат ос аквты порат ұшлахтуңкве минәгыт.

Алексей Варлаков тох лавыс: «Ань предпенсионер хөтпа ат те рүпиты, безработица хосыт винэ оланэ нөхнүв нәтвәсыт. Россия янытыл 11 сөтыра 280 солкөвил ойтает. Округувт ос Кондинский районт өлнэ предпенсионер мәхум 14 сөтыра 664 солкөви, мөт районутт – 16 сөтыра 920 солкөвил тәстает. Рүпитама мәхум манах солкөви вуйласыт, тувыл хүрум этпос 75% сәвитыл ойтает, тувыл элаль нила этпос ос 60% сәвитыл, та юи-пәл этпосытт тәл мус 45% сәвит ол-

ныл ойтает. Ань округ янытыл 171 предпенсионер хөтпа ты щирыл ойтает».

Хум элаль та урыл потыртас, ань ты мәхум рүпатаныл пөханкөтуңкве ат рөви. Хоты күщай тох вәри те, тав пушаве ос сутытава. Пенсия пораныл ляпаман мәхум мәгыс сәв эрнэ нәпак хансым олы. Хотьютн лөкамтавет те, сәккон щирыл тармыл патает.

Предпенсионер мәхум мәгыс сәвсыр ханищтапыт вәрыглавет, хөтпа профессия өньщи те, та щирыл йильпииг ханищтахтуңкве вөрми. Рүпата киснэ департамент пәлыл та элумхөлас сыресыр вәрмаянэ пуссын ойтает.

Светлана МАТВЕЕВА

КАСНЭ ВАРМАЛЬ

Ёсал хайтуңкве сав мир ёхталас



Маньши махум



Махум ёсал хайтуңкве

Ханты-Мансийск үст Горный нам-па ят сав махум ёсал хайтуңкве акван-атхатыгласыт. Ты вармаль руц латңыл «Югорский лыжный марафон» нама-им олы. Касыл касың тал яныгполь этпос овылтахтын порат уцлахтын хоталт щёпиталаве, ты тал хот щислат варыгласес.

Муй махум Россия янытыл ос Францияныл, Швейцарияныл, Казахстаныл, Норвегияныл, Латвияныл, Польшаныл, Чехияныл, Швецияныл ос Белоруссияныл мот хон маньтыныл тыг ёхталасыт. Ты яныг касыл округ мирколт рупитан куцаит ос «Открытие» нампа олн ошнэ кол щёпиталсыг.

Ты тал кит сотыра арыгкем элумхолас ёсал касуңкве хасхатыгла-

сыт, махум 5, 25 ос 50 верыста аквторыг хайтсыт. Акв сотыра атсат хотпат 50 верыста хайтуңкве касасасыт.

Ты каснэ хоталн сасса махум касың тал воыглавет. Ты тал 17 маньши, ханты ос ёрн хотпат тув ёхталасыт. Молты тал туп акв верыста хайтсыт, ты тал — кит верыста 20 метра.

Тан халт Сергей Айваседа нох-патыс. Тав юи-палэт Иван Ми-

рон ёхтыс, пыг китыт мёстал майвес. Маньлат пыгыг Нижневартовский район Варьёган павылныл олэг. Хурмит места Иван Гаврильчик вис. Маньши пыг Ханты-Мансийск үст олы, Технолого-педагогический колледжит нилыт тал хаництахты.

Сергей Айваседалавыс, тав салың сун ултта поргуңкве, тыньшаң рёпыгтаңкве, сграп пахвтуңкве, акв маньл элаль порыгмаңкве ос туй маньхапыл товуңкве 11 талныл хаництахты. Молты тал Ханты-Мансийск усн касуңкве ос ёхталас, тонт тав китыт места вис. Ань нила этпос ёсал касың хотал хайтыгтас ос мусхалыг щёпитахтас. Ты элы-палт Варьёган павылт районый ялпың хотал варыгласес. Тув салың махум, вораян ос хул алышлан хотпат касуңкве ос муйлуңкве атхатыгласыт. Тонт Сергей ёсал хайтыс ос овыл места вис. Тав атятэ Леонид Леонидович Айваседа тренер-хотпаг рупиты, пыге ос мот няврамыт касуңкве хаництыяна. Ты тал 12 няврам ос маньлат агит-пыгыт тав этэ усувн ёхталасыт.

Нэкет ос агит Халт Ханты-Мансийск үст «Лылың союм» нампа колтрупитан нэ Раиса Гаврильчик нох-патыс. Раиса Мартыновна лавыс, ты тал ёсал тав шар ат хайтыгтас. Тыммагсыл касуңкве мощ тарвитың олыс. Финиш мус тав нас ёртал ёхтыс, тувыл нэ халт шар пелпыщ нуйхатас, агит ос нэт пуссын ювле хультуптасанэ. Раиса школат хаництахтамет акваг ёсал хайтыгтас, тыммагсыл тох касуңкве ёмашакв хасы. Китыт ос хурмит места кит агииг висыг. Тэн сас Нижневартовский район Варьёган павылныл ёхталасыг. Агииг аквхурип нам ос опарищнам оныщег, тэн сас Ксения Айваседа лававег. Тэн ос Леонид Айваседа ёсал хайтуңкве хаництавег.

50 верыста ёсал касум хотпат халт овыл места олимпийский чемпионыг олнэ хум Евгений Дементьев вис. Тав Советский район Таёжный павылныл олы. Нэт халт Мария Грэфнингс, Швеция мот хон маньл ёхталам нэ, нох-патыс.



Маньлат пыгыт янытлавёсыт

Людмила ТЕТКИНА

КЎЩАИТ РҮПАТАНЫЛ

«Титул» яныг сапрәни вәри

Ты этпос 22 хөталәт Ханты-Мансийск үст «Титул» колт рүпитан хөтпат сапрәни вәрәгыт, рущ ләтңыл ты кол тох ләваве – «Инвестиционная компания социальной защиты и развития малочисленных народов Севера».

Ань тән округувт олнә мәхум вөвияныл, тән ты сапрәнин вос ёхталәгыт. «Титул» колт рүпитан кўщай мәхум тананылн потыртәгыт, ювле хультум 2018 тәл сьс вәрум рүпатаныл урыл, манах олн сәл-сыт, хумус тәнаныл холтсаныл. Эрнә сәвит

хөтпа сапрәнин ат те атхатәгыт, тән ос мөттыт этпост, яңк нәтнә этпос 23 хөталәт, сапрәни титынтыг вәрияныл.

Рүпата коланыл Ханты-Мансийск үст Карла Маркса үсхулыт 15 коләт олы. Тот ты мир акван-атыяныл. Лов

щәс юи-пәлт тув ёхтын хөтпат наманыл пуссын нәпакн хансуңкв патавет. Титхуйплов щәс порат рүпитаңкв та овылтахтәгыт.

Хотьют мөт үсныл ёхтуңкв те кәсаши, тав яласан ләңхе мәгыс олныл ат миве, хотты колт олнә мәгыс олныл ос ат ойтаве.

Ос ань хотьют тув ялуңкв ат те вәрми, ос такви «Титул» тәланә урыл вәңкв сака кәсаши, тот потыртан ләтңыт ловиньтаңкве, та

хөтпа ищхйпың утыт тамле лөпс вос хөнты – <http://www.titul.org//>.

Тот эрнә нәпакыт хөнтуңкве рөви. Маныр урыл тот титыглаве, ювле ләтың хансуңкв эри. Ос тананылн кәсың акционер-хөтпа электронный адресә эри. Тән ләххалыт, матыр хүлтнә ләтңыт пуссын тув тах тәтуңкв патыяныл.

«Титул» колныл тәтым ләххал мәньщи ләтңыл Валентина Хозумова хансыстә

Сосса мәхум олнә-хүлнә наканыл вәвет

Ас-угорский институт рүпитан мәхум Ханты-Мансийск үст учёныт ювле хультум этпос 29 хөталәт акван-атыгласаныл. Тән «Этнокультурное пространство Югры: опыт реализации проектов и перспективы развития» вәрмалит урыл потыртасыт.

Ты тәланыл округ миркол пәлыл вәруңкве нәтавет ос тананыл уральтым оньщавет. Сәв мәныл акван-атхатыглам учёныт щәнә ләтың ванә ос тананыл ханищтан овылтыт, пәс накыт элалә тотнә вәрмалит урыл потыртасыт.

Санкт-Петербург үсныл ёхталам хум А.А. Бурыкин ты урыл потыртас, лүимә мирыт щәнә ләтңаныл налыман тәл сьс хөт ос хумус ханищтавәсыт, манхурип нәпак ос маныр тәрвит тән ощсыт.

О.И. Налдеева, Мордовский государственный университетт рүпитан профессор-нә, финно-угор рүт ма-



А. Шиянова, Н. Вах, А. Станиславец, С. Дядюн, Ч. Хорват китыт сессият рүпитәгыт

хум стихыт хансум тәланыл тәра-паттысанә.

Москва үсныл Е.А. Пивнева ос Тула үсныл Е.П. Мартынова ёхталам нәг хантыт ос маньщит олупсаныл овылтыт потыртасыт. Тән сас история наукач учёныг оләг, округувн вәтихал ёхталәг ос сосса мәхманув ёт хөнтхатыгләг.

Щәнә ләтың элалә тотнә вәрмалит ос няврамыт мәгыс эрнә нәпакыт щәпитан урыл А.Р.Станиславец, Ханты-Мансийский технологический

колледжит ағит-пыгыт ханищтан нә, ләвыс. Тав Ас-угорский институтт рүпитан мәхманә мощ сәрьёрыг олүңкве ләвсанә ос нәпакыт щәпитан рүпатаныл ёмщакв ос номтыңыг вос вәрияныл. Тув тәстым олныт мак тәла мәгыс вос холтавет.

Тувыл «Ханты ясанг» ос «Лүима сәрипос» ханты ос мәньщи газетач урыл Н.И. Вах, кўщай ваңын нә, потыртас. Пүмыщ потыр венгр нә Чилла Хорват ловиньтас ос хурит суссылтас. Тав

Ханты-Мансийск үст щәнә ләтңыл хансым колыт хөт оләгыт ман ати, таи насати сунсыглам.

Тот сәвсыр научный потрыт ос ловиньтавәсыт, ётыл тән пуссын нәпакыг тах вәравет. Ань кўщайтн сосса мәхум тәланыл, маныр тән таңхәгыт, тән мәгсыланыл маныр вәруңкве эри – ты номтыт тәра-паттувәсыт. Учёный хотпат ләвнәныл щирыл, рүпатаныл элалә аквтох ёмашакв тах вәрияныл.

Тамара МЕРОВА

Нявраманын пусмалтаңкве ялэн

Ман махманум нявраманыл ёт округув янытыл хёт ўщлахтуңкве вёрмёгыт, торың аты ваганыл. Ам ань Сургут ўс ляпат олнэ няврамыт пусмалтан кол урыл хансёгум, руц щирыл тав лававе – «Сургутский центр социально-го обслуживания населения».

Няврамыт тув тотнэ-ныл порат овлёт лек-карытын сунсавет ос манарыл тананыл пусмалтаңкве хансавет. Тот хурум отделение олы, овыл отделеният няврамыт щань-ащ тал оныщавет, тот ват нупыл акв хотал мус ўщлахтуңкве рови. Тув 3 талныл ос 10 тал яныт няврамыт вивет, тан ётаныл воспитателит рупитэгыт, послуңкве, катыл матыр-ати воруңкве ханищтавет, савсыр процедуратын ванталавет.

Титыт отделеният агмың-мосың, сакватахтам няврамыт оманыл ос атяныл ёт ўщлахтуңкве ёхталэгыт. Ёмыгтаңкве ат вёрмын агирищит-пыгрищит магсыл матыр эрнэ коляскат, перинат олэгыт, тан ётаныл тот пергатахтыглаңкве махманылн кустырнув. Няврамыт пувлын ваннатын тотыглавет, электропроцедуратыл вартыглавет, хотыют пос-

луңкве вёрми – ханищтавет, пластилиныл, рактыныл савсыр хурит таңрегыт.

Хурмит отделение сав няврамың щёмьят магсыл рупиты. Тув хурум ос тувыл савнув няврам ошнэ щанит манос ащит няврамың тагыл ўщлахтуңкве ёхталэгыт. Ос аквтох, тан оманылн пувлуңкве тотыгпалавет, алпияныл массажил варавет, хунь ома пуссын нявраманэ ёт ат алыми, тан ётаныл воспитателит рупитэгыт, хоталь эри, хайттавет.

Хотыл сыс пуссын ат щёс тыттавет, сака ёмас, атың, портың тэнут тот варавет. Ты коньпал луптаң щайл айтавет, нёр хольт варим коктейлил няврамыт тыттавет. Этипалаг каснэ яныг колнакн ялуңкве рови, тот тан ёнгалтавет, нюнсалахтыглаңкве ханищтавет.

Алла Устюгова, хурмит отделеният кўцаиг рў-



Центр ишхипың лопсыңыл вим хуритув

питан нэ, лавыс, тан центраныл касың ётпос ёхтын ос ювле миннэ хоталыт хансым олэгыт, тув няврамыт тит манос хурум сатын вуйлавет. Оманыл, атяныл ос тан ётаныл тот мўсхал щирыл ўщлахтэгыт, пусмалтахтэгыт.

Анастасия Лоскутова, хёт нявраманэ янмалтан нэ, лави, тан Сургут ўст олэгыт ос ватихал ўщлахтуңкве тув ёхталэгыт, тав щёмьятэн тот сака ёмас. Тал сыс хурум щёс тув ялуңкве рови. Савыңпалэ школат каникулыт олывлан порат

тув ялантэгыт, ос хотты няврамён школан те эри, тувыл ханищтахтуңкве тотыглаве.

Тамлеты эрнэ ос ёмас кол округувт олы, тув сав палылы махум ўщлахтуңкве ёхталэгыт. Ты центр кўцай нэ Ася Шокшина лави, тан палтаныл нан ты телефон хосыт свонитаңкве вёрмегың 8 (3462) 518-814, тот местат акваг оныщёгыт. Няврамыт магсыл олн ойтуңкве щар ат эри, щанит-ащит рупата палылы справка вос выгыт, мансавит олн сэлэгыт, тот сунсавет ос эрың матсавит тах ойтэгыт. Тот тынаныл яныг ати, сав олн ат ойтэгың.

Матыр титыглан латың те оныщегың, пуссын ты телефон хосыт титыглахтэн. Тот сака ёмас ос сымың хотпаквет рупитэгыт, касыңе лялыт ёманты, матыр ат ваглын, нётавен, хўлтавен. Ты центр урыл нанти ловиньтаңкве тахтамаегың, ищхипың лопсыт «Центр на Калининке» хансён, тот пуссын эрнэ потыр хонтэгың.

Галина КОНДИНА



ПАВЛЫҢ МИР ӨЛҮПСА

Тэлы лёңх молях толас



Ты тал Хальүс районт мән павлыт халт машинал яласан тэлы лёңх мәнполь этпос ват нупыл онтолов хоталт лап-пантвес. Ты порат молях малтыпыг ёмтыс, түйт сав кос олыс ос сёюмыт палыг та патсыт. Молты талт тэлы лёңх хосыт яныгполь этпос хусыт хоталэ мус машинал тыгле-тувле махум яласасыт.

Ань Лопмуст олнэ ахотпат тэлы лёңх тал та хультсыт, воссыг мот павлытн яласан лёңх атим. Тэлы-түйт ам тув ялсум ос тонт Николай Алексеевич Соляной, павыл кұчай ёт, потыртасум.

Хум тох лавыс: «Лопмуст 325 элумхолас олэгыт, савыңпалэ яныг хотпат, тан хул алыщлэгыт ос вораегыт. Хум хотпат найпос варнэ станцият ос най харыгтан колт рупитэгыт, нэкет школат ос мән няврамыт үрнэ колт. Тувыл йильпи үнттым ФАП-пўльница оньщев, тот акв леккар нэ, санитарка ос кўр палтыглан хотпа рупитэгыт. Ты коланув матыр комиссиян уральтаңке тованакт ёхталавет, ос нэмат люль вармаль ат хонтэгыт, ювле та минэгыт.

Юи-обвыл тал сис павлут сав олнэ кол

үнттувес, ань 11 щемьят йильпи колн олүңке вантлысыт. Ты колыт «Сосьва» обцинан, кўцаиг Николай Полуанов тот олыс, ос «Рахтынья» обцинан, кўчай Александр Голшубин, үнттувэсыт.

Тэн махманув тэнки палтэн рупитаңке вуйлысанэн. «Рахтынья» Лопмустн сат хотпа рупитасыт, тан кол үнттысыт, хул алыщласыт, вораюсыт. Ты обцинан Кульпаст тэнут полтнэ кол оньщегыт, пувум хуланыл тот оньщияныл. Тэлы үсныл хул ёвтнэ хотпат танки тув ёхталэгыт. Тованакт павлың щемьят туп тох олн сэлүңке вёрмэгыт.

Павлүв Лопыңья ватат үнлы, махманув тувыл айнэ вит танки магсыланыл тотэгыт. Витэ айнэ магыс ёмас ман ати, ат ваглум,

ман тай пуссын таве аюңкве ханьщувласүв.

Юи-обвыл тэлыт тыт моща няврам самын паты, школат ос моща няврам ханищтахтуңке хультсыт. Щар мән няврамаквет садикн тай ялантэгыт. Мәнлат агит-пыгыт элал ханищтахтуңке минэгыт, ювле ат ёхтэгыт.

Това щемьят мот павылан ман үсн олүңке вантлэгыт. Ос мощ пора мины, хотты акв-кит хотпа туп ювле-ёхтэгыт. Ань щар яныг хотпаг тыт Михаил Васильевич Лелятов олы, таквсы порат ойка 75 талэ тах товлы».

Лапкат рупитаннэ Лэльвира Лаптева ос Валентина Юрьева ос Валентина Юрьева ёт ос потыртасум. Тэн лавсыг: «Лапкав Кульпас рыбкооп паллы рупиты, тан тэнут ос савсыр пормас тыг тотэгыт. Мән тэлы лёңх олнэтэ сис сав тэнутыл тыг тотуңке алымавев. Тонт пормасыт тара лапка ляпан тотавет. Махум ань кол кивырт ошнэ савсыр пормасыт, кол

үнттын ос щёпитан пормасыт китыглэгыт.

Туи я хосыт парсал тыг кетавет ке, манавн налми ватаныл паг-алумтаңке тәрвитыңыг олы. Това порат яв молях тосы, ос парса тумпын паг-пүхты. Тувыл ос сака тәрвит акваг моторхалпыл ялантаңке.

Тонт павыл хум хотпат нётуңке вовиянүв, ос тан ётаныл рупитаныл магыс тэнутыл ойтхатэв. Тыт тэнутыт ос пормасыт ати сака тыныңыт. Молал үсныл мүй махум ёхталасыт, лавегыт, тан үсанылт това пормасыт тыныңнувег олэгыт.

Ань нанки сунсән, лапкат матыр-ати эрнэ тэнут ос сыресыр фруктыт, овоцит пуссын олэгыт. Мән номсытэвт, туи мус товлавев тах».

Тох ты мәнщи павылкет махманув олэгыт, тәрвит ман ати, нэмхуньт тамле латың ат хулыгласүв. Пустагыл вос олэгыт, Төрүмн вос үргалавет.

Тамара
МЕРОВА

Пёс щирыл сакныл хартсыт

Ман ань өлтөвт сакныл матыр пормас хартэв – турлөпс, пальсак манос оlnкас. Ос пёс порат сосса махманув сакныл хумус хартсыт, манхурип пормас вәрсыт, ман ань торың аты ваглув. Хотьют хумус хасы, хумус номсы, тох та вәри, та мащтырлы.

Пёс щирыл сакныл хартнэ тэла ханищтан магыс маньщи ос ханты нэт Хальүс район Ягрим павылт акванатхатыгласыт. Район янытыл тув атпан арыгтем хөтпа ёхталас — Хальүс, Кульпас, Тэк, Восыңтүр ос Анья павлытныл нэквет, маньлат агит ос агирищит.

Ты тэла палт Любовь Васильевна Кашлатова тав пуңктоты. Нэ тох потыртас:

— Тынакт ман пёс щирыл сакныл хартнэ тэлав ханищтан магыс акван-хөнтхатсув. Округт өлнэ сосса мир нөх-вөрмалтан программа өвлэт 2015-2018 талыт сыс рүпитас, тувыл элалыт тотвес. Тамле хөнтхатылапыт ман ань 2025 тал мус вәруңкве вөрмөв. Тувыл элалы олныл миңкве патавөв ман ати, хунь вәве. Ман ань атыт щёс ты атхатсүв. Мөлты юнхатасүв, ань ос сакныл хартэв.

Хунь өвыл тамле хөнтхатыглап вәруңкве номылматсүв, ам мащтыр нэт нупыл лавсум: «Маныр оньщегын, пуссын ёт-тотэн». Номсәгум, пуссын акван-ёхтэв, пормасыт аквёет сунсылыянув. Төнт тах наңки, маснут ос өщнут ёмащакв вәрим олы ман ати. Та өвыл семинарын ам яныг учёный нэ – искусствовед ос краевед Наталья Нико-

лаевна Фёдорова вөвыгласлум, тав ань сосса нэт ёт вос потырты. Матыр ат те торгамтэгыт, вос хултыянэ, маснут манос хотты пормас мак эрнэ щирыл хумус юнтуңкве эри. Учёный нэ потре хунтлэгыт, тах ат лавёгыт, ты ам тох таңхөгум.

Төнт яныг спорт-комплекс колн пормасанув тотсанув, ләкквипинтлысанув, колноронтсыл тагталасанүв. Суссылтапув сака яныг олыс, касынув тасавит өщнут тотыс. Наталья Николаевна касың пормас сунсыгластэ, катыл малащластэ, нэт ёт потрамас, лавыс, хоты маснут пёс щирыл вәрим олы, төват ос ёмащакв щёпитанкве эрөгыт.

Та порат потыртах-



тасүв, тамле яныг суссылтапыт воссыг вәруңкве ат патэв. Хурум хөтал сыс сав матыр вәруңкве хунь алымөв, акв хотты тэла урыл потыртэв. Та юи-палтал Тэк павылн ялсүв, тот сас ёт рүпитасүв, сөвтыт ос хусапсовыт юнтсүв. Хурмит щёс Хальүст хөнтхатыгласүв, тот нуйныл пәквпалыт йинуңкве ос юнтуңкве ханищтахтасүв. Мөлты тал тыт, Ягримт, маньщи ос ханты нуйсахи юнтсүв.

Тыг йимув элы-палт касың нэн лавсум,

хотьют пёс нуйсахи оньщи те, ёт-тотэн, тувле сунсым юнтуңкве патэв. Йильпи щирыл вәруңкве ат патэв, пёс махманув хумус юнтсыт, тох йинэв, щёпитэв. Рүпатав семинарт өвылтылүв, элалы юн юнтылув.

Тыт акв нуйсахи вәсүв, мощ маньщи щирыл ос мощ ханты щирыл юнтыма. Пәквпаланэ маньщи пәквпалыт кос, ос кит оспа хорам юнтнэ төрыл юнтыма. Маньщит акв оспа хорам вәрөгыт, хантыт – кит.

— **Любовь Васильев-**





Л. В. Кашлатова



В. Е. Полякова

на, наң ӧс улпыл нӗт ӗт потрамӗгын, ӗлнаң мӑхманув хумус мащтырласыт, ханищтыянын?

— Атхунь, ӧвлӗт мӑн потрамӗв, хотьют пӗс пормас ӧньщи те, суссылтытӗ, лӑви, хотьютн вӑрвес, хӧт ос хунь юнтвес. Ам нӑквет нупыл лӑвӗгум, мӑнавн ань таимӑгыс ханищтахтункве ӗри, пормасанув пӗс мӑхманув вӑрыгламаныл холт вӧс щӗпитыянӧв. Мӑнти номылматнӗв щирыл ул вӧс юнтӗв, тӑн тӗланыл ӗлаль вӧс тотыянӧв.

Сосса мӑхманӧв кӑсың мӑт тӑнти щираныл юнтсыт — Тӗк пӑвыл нӗ тох вӑрыс, Кульпаст, Восыңтӗрт манос Лопмуст мӑхум маснутапыл шар мӧт хурипат. Хотьютув хотыл ӧлы, тот ӧньщам маснут холт вӧс юнты. Кӑсыңув такви вӑрнӗ тӗлатӗ мӧсхал щирыл вӧс ханищтытӗ, матыр-ӑти тӑра вӧс патты, вӧс кисхаты. Тох рӧпитаңкве патӗв те, мӑн маснутанув ӗсгуңкве патавет. Вӑнӗ хӧтпа тах лӑви, суп манос сахи татем ӗмащакв юнтыма, пӗс мӑхманув тамле маснутыл ты ӧлсыт.

Тамле хӧнтхатыглапыт кастыл ам янас потрыт щӗпитӗгум, рущ щирыл лӑваве «доклад».

Мӧлты ханса урыл потыртасум — хунь тӗлыс, ӧвлӗт хӧт кӑсалавес, маныр тармыл щуртвес, хумус йинуңкве патвес, та маныр. Тынакт ос сакныл хартнӗ тӗла ӧвылтыт потыртасӧв, тувыл щакщункве та юнтсӧв.

Мащтыр мӑхум мӑн район янытыл кинсӧв. Пӑвлытныл ӗхталам нӗт нупыл акваг лӑвсалӗгум, пӗс тӗлат вӑнӗ хӧтпат ӗт вӑйхатӗгын те, ӑнумн лӑвӗн, свонитӗн. Ам тӑн наманыл нӗпакын хансыя нум, тувыл хунь тамле семинар вӑрӗв, тӑнаныл пуссын вӧвия нӧв.

Тыт акваӗт рӧпитӗв, халуvt ханищтахтӗв. Ам мӑк таи таңхӗгум, хӧтпа ӗмащакв мащтырлаңкве вӧс ханьщувлы. Пӗс порат юнтым маснутыт вӧс вӑганӗ, та щирыл вӧс йини, тувыл ущ вӧс юнты. Сакати аква хотьютув «Народный мастер» намыл вӧс минуве, районув янытыл тамле нам нӗмхотьют ат ӧньщи.

Ам номсӗгум, хунь тах мӑн нӑквенув ос хум хӧтпанув наманыл

вӑнкве патавет. Ань сус-тӗмт, тӧваныл сака ӗмас пормас вӑрӗгыт, нӗтнӗ пӑквпалың супыт юнтӗгыт.

— **Наң супын татем нӗтнӗ, хотьютн юнтвӗсын?**

— Ты амти юнтум супум. Ам Мулигорт пӑвылт самын патсум, яныгмасум. Супум та мӑхманув ӧньщам маснутаныл холт вӑрыслум.

Мӑнщи ос ханты нӗт хӧрум хӧтал сакныл турлӧпс хартсыт. Хотьютаныл турлӧпс вӑруңкве хӑсы, сусылтас, хумус ӗри хартункве, мансавит оспа сак тув вӑруңкве ӗри. Ат хӑснӗ хӧтпа ханищтахтас, сунсыс, хумус мӧт нӗт рӧпитӗгыт.

Кульпасныл ӗхталам мӑнщи нӗ Зоя Петровна Тоголмазова лӑвме щирыл, тамле хӧнтхатыглапын тав кӑсыңӗмт ӗхталы. Такви юн акваг юнсха-

ты, мӑнщи суп манос лӑгыл маснут пуссын юнты. Увщитӗ Нина Петровна Неттина Тӗк пӑвылныл ӗхталас. Сӑв мӑнщи нӗт Восыңтӗрт пӑвылныл ӧлсыт. Ягрим нӗ Марина Сергеевна Вынгилева тув апыгрищаге ӗт ӗхталас. Нӑврамыг мӑнщи супыл масхатым ӧлсыг, сак хартункве ӧс ханищтахтасӑг. Тӗк пӑвылныл ӧлум ханты нӗ Зоя Абрамовна Новьюхова щакщекватӗ вӑрыглам турлӧпс сусылтасӗ, лӑви, тавӗн яныгсӑт арыгтем тӑл.

Хӧнтхатыглап оигпам ӗлы-пӑлт кӑркам нӗт мӑнщи ос ханты ӗргыт ӗргысыт, йиквсыт. Любовь Васильевна Кашлатова тӑнаныл янытласанӗ, лӑвыс, мӧтыт щӗс со-вӑя вӑй вӑруңкве патӗгыт.

Светлана РОМБАНДЕЕВА

ПАВЛЫҢ МИР ӨЛУПСА

ЯНЫГ КОЛТАҒЫЛТ ЯНЫГМАМ НӘКВЕ

Ты этпос 15 хөталэт Зоя Ивановна Албина, такви Өпарищ наме – Тихонова, намхөталэ Өлыс, тав 60 тәлә төвлыс. Тав ань ты хөтал мус Саранпәвыл школат рүпиты.

Щәмьяныл урыл

Зоя Ивановна яныг колтағылт самын патыс, тав шар яныг нъявrameгы Өлы. Тән хумус Өлсыт, тав ты урыл тох потыртас:

— Ам Люлюкары пәвылт (пәс порат «Яль-юс» тох ләввес) 1959 тәлт самын патсум. Ты мән пәвыл Ягрим ляпат Өлыс, хөт вёрыстат үнлыс. Төнт Сакв мәхум пуссын тув хұл алышлаңкв тетыглавёсыт. Атям Өс тув рүпитаңкв тетвес. Тав наме Иван Платонович Тихонов Өлыс, Ясунт пәвыл хум. Тот хөт ты омав ёт акван-хөнтхатсыг.

Омав, Елизавета Васильевна Саратина, Люлюкары пәвыл нә Өлыс. Атям тот хұл пирмайтан хумыг рүпитас, омав охсарыт тыттысанэ. Акван та минасыг, ам тот 1959 тәлт самын патсум. Тувыл Валентина эщум тот самын патыс.

Та юи-пәлт ущ омагум-әтягум Ясунт пәвылн вәнтлысыг. Мөт әпширищанум, йигрищанум пуссын Ясунтыт самын патсыт. Атяв тот хұл алышлым рүпитас. Омав мән ётанув юн Өлыс. Ләшлакв хотмус Өлсүв, Ясунтыт пуссын яныгмасүв. Атяв Тихонов рүтанэ пуссын Ясунт пәвыл мәхум. Саранпәвылт ос омав ляпа рүтэ Өлыс, Матвей Сангилев.

Ам мәниг Өлсум, но-

милум, мән Люлюкар пәвылн анёквав пәлт ялсүв, төнт тав тактёт тот Өлыс, ащөйкәв әтимыг ёмтыс. Титахтем щёс ялсүв, тувыл тав хотталы шалтыс, вөссыг ат ялантасүв.

Ясунтыг ханищтахтасум

Ам нёлолов тәлум төвлыс, туп төнт омагум-әтягум әнум школан мистән. Ам «нулевой» классын үнттүвёсум. Мәнав Александра Яковлевна Гоголева ханищтаңкв патсанэ. Тав эще Елена Яковлевна Хатанева Өс тот рүпитас.

Мән сака мощща Ясунтыт ханищтахтасүв, хурум ман нила этпос. Тувыл школав лап-патвес. Мән, нъяврамыт, пуссын Сүкыръя школа-интернатн тотвесүв. Ос тот сака сәв нъяврам Өлыс. Мән Сортыңъя пәвыл школа-интернатт элалта тетвесүв. Тот Өс мощ ханищтахтасүв. Саранпәвылт интернат-кол үнттын мәнныл әстлыма юи-пәлт мән пуссын ювле пәвлун та тотвесүв. Тох ты та порат мән ханищтавесүв.

Рүпитаңкв тәра патсум

Школа ам Саранпәвылт әстлыслум. Нёлолов класс юи-пәлт омагумн-әтягумн нётнә мәгыс ам рүпитаңкв



Зоя Ивановна Албина

минасум. Пүльница тапәлт Өлум интернат күщаиг төнт Михаил Александрович Прохоров Өлыс, тув рүпитаңкв та патхатасум.

Аквта порат тот Лөпмус хум Иван Константинович Албин рүпитаңкв патыс, мән тот вәйхатасмән, акванминасмән. 1981 тәлт Андрей пыгмән самын патыс, 1988 тәлт - Настя әгимән. Ойкам әтимыг ёмтме пәсыл титхуйплов тәлыг ты ёмтыс, тав тәрвитың әгм Өнъщис. Тав ляпа рүтанэ ань Саранпәвылт, Лөмпуст, Хәльүст Өлэгыт.

Ам ос рүпитаңкв Өвылтахамум пәсныл мощёрт налыман тәлыг ты ёмты, школат, интернат рүпитасум. Нъяврамагум яныгмасыг, ань намхөталум юи-пәлт пенсиян минёгум, рүпитаңкв төвлы.

Нъяврамагум урыл

Андрей пыгум Югор-

ский университетт ханищтахтас, әстламе юи-пәлт Саранпәвылн рүпитаңкв ёхталас. Тувыл Хәльүсн минас, тот Ирина Поята әквөн нётвес, тав колёт Өлыс. Тот акв әги нёг тотыстэ, ань тит нъяврам Өнъщөг. Өлнэ колән мән, акв колнакың колт Өлэг. Тән пәлтаныл комиссия мәхум юв ёхталасыт, уральтахтасыт, тән хумус Өлэгыт. Эрың, мөт колыл тах мивет.

Настя әгим Өйкатэ наме Юрий Ларионов, тән Өс тит нъяврам Өнъщөг. Яныг әгитән Яна, тав мәнъщи ййквыт ййквуңкв хасы. Снежана иң мән. Матыр рүпата вәруңкв те эри, тән әнумн нётэг. Мөлт ты тән картёпка әнумн үнттысыг.

Әпщим пәвлувт Өлы

Щәмьявт мән онтолов нъяврам яныгма-



сүв — ам, Валя, Вера, Тимофей, Катя, Маша, Гена, Митрофан ос

Ольга. Омав тәрвигың әгме паттат молях әтимиғы емтыс, атпан тәлә аты төвлыс. Атяв ос мощ олыс, тувыл лаглаге матыр әгмыл емтсығ, емыгтаңкв ат вәрмыс, ос хоса ат олыс.

Ань Ясунтыт Тимофей Лена экватәнтыл олэг. Валяв колтаглә эт Саранпавылт олы, ойкатэ Коля Саратин, тән акв әги оныщег. Верав ос тыт олы, хурум няврам оныщи. Акв әгитэ ань хум вәрыс, ойкатэ Андрей Немдазин, Ясунт павыл хум, тән ань тот ты олэг.

Катяв Кульпаст олы, ойкатэ Алексей Лелятов, тән тит әги ос акв пыг оныщег. Машав Няшамволь павылт олы, ойкатэ Илья Номин, тән тит әги оныщег. Ольга эщув хот Сүкырьят олы.

Катя щемьятэ эт Саранпавылн акваг ехталы, тыт мощ мүйлэгыт. Тән ойкатәнтыл юн мәнщи ләтңыл потыртэг, нявраманән ләтың ос вагыт. Ань апганэ потыртаңкв ханищтыянэ.

Эщанум ань пуссын апыг няврам оныщегыт, нявраманыл пус-

сын янгыт. Ам амти ос нила апыг оныщегум.

Тамле потыр ятил мәнщи нәкве Зоя Ивановна Албина ты потыртас. Ань нәмхоталэ кастыл мән таве мәнщи газетав тәра янытлылүв, сав емас ләтңыл лавилүв – Төрүм эт, Отыр эт элалы олән, пус кәт, пус лагыл. Най-Отыранын вос ұрғалавен.

**Валентина
ХОЗУМОВА**

Товлың ұй малтып тотыс

**Ты этпос котилыт Ханты-Мансийск
Ұст «Ұринэква хотал» вәрыглавес.
Тот ёрнколыт ос палаткат тўшталәлвёсыт,
кәтыл вәрим сәвсыр пормасыт тыналавёсыт.
Няврамыт мәгыс пұмыщ ёнгыт щёпитәлвёсыт.**

Ұринэква маснут вәрум хотпат халт та хотал касыл олыс. Нохпатум махум пуссын мүйлупсал майвёсыт. Әргын, ййквнэ ос сәңквылтапыл сәңквылтан ёнгын колыт хотал палыт концерт суссылтасыт. Ты ялпың хоталн сав мир акванатхатыглас.

Ұс котилыт атхатыглам мир янытлан мәгыс округ кұшай вәңын хум Всеволод Кольцов ехталас. Тав мөлты ос ты тәл мән няврамыт

самын паттум ханты ос мәнщи щемьят пуссын янытласанэ. Ұст олнэ мән няврамың нэт-хумыт мүйлупсал мүйлуптасанэ ос элалы пұстагыл олнэ ләтың тананылн ләвыс.

«Ұринэква хотал» сосса мир пёс йис тагыл янытлыяныл. Ты товлың ұй ехтын порат малтыпыг та емты. Тав махумн сав сөт ос шунь тоты. Ұринэква ехты, вора-ян, хұл алышлан хотпат ос пуссын махма-



нув сунсэгыт, ты тәл ят витэ мән янытаг паты, ворт мансәвит пил, ләхыс тах яныгми, элалы олнэ хоталыт хумлег емтэгыт.

Ань вәрыглым ялпың хоталт тыщир потыртавес. Ты порат сав пұмыщ вәрмалы щёпитәлвес. Пёс махманув әлпыл нох-квалэгыт, щеваланыл палтэгыт. Тувыл нётнэ маснудыл масхатэгыт, рунаныл палт мүйлупсан тагыл минэгыт. Атың тәнудыл тагылың пасан вәрыгласыт. Әргысыт, ййквсыт ос сәңквылтапыл нётнэ таныт ёнгысыт.

Няврамыт нох-квалэгыт, щәняныл-әща-

ныл ййв ёлы-пәлн пиным товлың ұй питит кинсуңкве овылтахтэгыт. Пёс потыр щиррыл, пити хонтнэ няврамыт сөтыл пинавет. Тән олупсаныл емасыг емты, колтаглыл элалы щәгтым олуңкве патэгыт.

Ты ялпың хотал 2011 тәл пәсныл округт мүйлуңкве патвес. Тонт «Ұринэква хотал» округ ялпың хоталыг вәрнэ мәгыс округ Ду-мат сәккон пирмайта-вес. Ань ұс котилыт атхатыглам мир мәгыс исум щәй ос атың нянь тыналавес. Махумн тот ұшлахтуңкве сака мүс-тыс.

Николай МЕРОВ



Салыт Өщнэ щёмья

Сургутский районт пёс йис мātэт
Ссалыянэ ўрим акв ёрн хум олы. Тав
наме Сергей Хомаказович Айваседа, хум
Белоярский район Нумто павылт самын
патыс. Тав Касум павылт школат нёлолов
класс астлас.

Молал ам тав палтэ ялсум. Хум такви олупсатэ урыл мощ потыртас.

Сергей Хомаказович школа астлас ос Салехард усн элал ханищтахтуңкве ми нас. Тот училищат кино механикыг ханищтахтас. Та юи-палт Нумто павлэн ювле ёхтыс.

Тувыл нёлоловхуйплов талэ товлын мус хөтахкем этпос павылт мирн кина суссылтым рүпитас. Та юи-палт ос армян вуйвес. Мәнълат пыг кит тал Иркутский область Усть-Кут үст лусытас. Тав тот «БAM – Байкало-Амурская магистраль» нампал лёңх вәруңкве нётыс.

Тувыл юв ёхтыс, мощ олыс ос нэ тотыс. Экватэ наме Татьяна Владимировна Айваседа, тән Нумто павылт акван-минасыг. Тот салың колт рүпитасыг. Экваг-ойкаг аквёет хот нйврам яналтасыг.

Яныг агитән Людмила, тав этэ салы ўрнэ мāt олы. Юн колсори рүпата вәри. Тав салыл ос машинал яласаңкве хасы. Владимир пыге Сургут үст карыс колныл ёлпатыс, ань агмлахты.

Виталий Ханты-Мансийск үст Югорский университетыг ханищтахтас. Ань нэ тотыс, Нижнесортимский павылт олы. Тот мāv-вөй нөх-винэ мāt рүпиты. Наталья ойкәтэ ос нйвраманэ ёт Когалым үст олы. Тувыл

Кристина самын патыс, тав ань ханищтахтын мәныл астыс. Щар пити-патта пыг Артём, тав иң ханищтахты.

Ань экваг-ойкаг киттыг-минасыг. Хүрум тал ювле хульгум порат Сергей Хомаказович Сургутский районын вәнтлыс. Тот салы өщнэ мал майвес. Тән ащитәнтыл тот норыт яктысыг, йильпи кол, сүмъях ос пувлыңкол үнттысыг.

Ворколаныл яныг, тән палтаныл Когалым үсныл рүтаныл вәтихал ўшлахтуңкве ёхталёгыт. Таквсы порат тән тот саңквлыпил ос сүйпил вәтёгыт, ләхыс атёгыт, пәкв паттёгыт. Вөр павланыл ляпат союм овты. Та союмт арпи вәрёгыт, ошща ййвовлытыл вәрим камкат үнттёгыт. Сорт-пыгыт, сыгыт ос мот хулыт пувиньталёгыт. Ты союм янытэт ат поляве. Това мāt тэлы порат акваг палыг-олы. Павлың мәхум вит амартаңкве тамле асмасын ты ялантёгыт.

Сергей Хомаказович лавыс: «Сартын янгүйт вәтихал ёхталасыт, лёңханыл олсыт. Ань юи-өвыл кит тал щар ат вәщиньтыянув. Вөрың мāv мувлахи мāv-вөй мәныл нөх-винэ мәхум рүпитёгыт. Хот-ати яласан лёңхыт вәрим олэгыт. Яныг машинал акваг кургим тыгле-тувле яласэгыт. Янгүйн улпыл тыгле йиңкве пи-



Л. Айваседа нйвраме ёт, атятэ
 С.Х. Айваседа, Б. Айваседа

лыщмаң. Тыимәгыс тәнаныл тыт ат вәщиньтыянув. Хотталь мот сытам мән вәнтлысыт.

Ам тованагт писалюм выглум, ёсагум масэгум, вөраим мощ ёмыгтэгу́м. Щёпрыт, мансыныт, ятрит ос мот товлың үит вәщиньтыяну́м. Ос ляпан ат майхатёгыт, элыл тыламлэгыт, мөрсың порат патамталэгу́м».

Сосса мәхум нефтяникыт ёт договорнэпак хассыт, матыр тәрвит вәрмаль оньщегыт ке, тәнанылныл нётмил вөвёгыт. Салың хотпат мāv-вөйл пәңктым мāv хонтэгыт ке, нефтяникытын лавёгыт, тән ты мāv тара хот-сыстамтыяныл. Ань халанылт юртыңыщ олэгыт.

Когалым үст ос Русская павылт касың тал салыл каснэ вәрмаль вәрыглаве. Сергей Хомаказович ос агиятэ Людмила салыл касуңкве акваг ялантэг. Тән сав щёс нөх-патыгласыг, ёмас мүйлупсал майлувёсыг. Ань ты тал Людмила хүрмит места винэ мус мощнув акв матах күмыл ат төвлувес.

Ты ёрн щёмья вөрколанылт ам хүрум хөтал олсум. Юи-өвыл хөтал кол сыспалт йир тўщтысүв, салы аласүв. Пасан вәрсүв, элалёлнэ посың хөтал мāvгыс пуңкпинсүв ос пүрлахтасүв. Ты ёмас щёмьян ам пустагыл олнэ латың кётэгу́м.

**Николай
 МЕРОВ**

СОССА МИР КУЛЬТУРА

Няврамыт «Ўринэква хотал» янытласыт

Маньщи ос ханты махум ты этпос сатыт хоталэт «Ўринэква хотал» янытласыт. Хальўст нэпак ловиньтан колт рупитан хотпат овыл щес ты ялпың хотал вэрыгласыт ос няврамыт тув вобыгласыт.

Агиришит-пыгришит сосса махум пёс йис вэрмаляныл урыл савнунув вос вагыт, ты мирыг вос янытлэгыт, тыммагсыл тамле ялпың хотал тан щепитасыт.

Овлэт Хальўс школат 6 «В» классыт ханищтан агииг Оксана Вениаминова ос Полина Бирюгина маньщит ос хантыт «Ўринэква хотал» пёс порат хумус янытласыт, та урыл мүй махумн потыртасыг. Полина Рауданен, Юлия Авзалова, Вероника Зырянова, ос

Алексей Торохов няврамыт салың сун ұлтта поргуңкве, ошща йив кит нупыл хартуңкве ос мот сав щирыл касуңкве ханищтасаныл. Щар мань няврамаквет магсыл «Хохра» нампа ханты мөйт суссылтавес.

Пёс порат сосса махум «Ўринэква хоталт» пасанын тэнут щепиталсыт ос мүй махум вобыгласыт. Библиотека рупитан махум няврамыт магсыл ос хул исмит пайтсыт, щаил айтсаныл. Ос касың няврамакве мүй-



лупсал мүйлуптасаныл.

Хальўст нэпак ловиньтан колт рупитан махум округ Думат депутатыг рупитан хумн Руслан Проводниковын яныг пумащипа латың кетэгыт. Мирн

ванэ маньщи хум ты ялпың хотал вэрыглан магсыл оln тананылн тастыглас.

Марина Табун кетум потыр маньщи латңыл Людмила ТЕТКИНА хансытэ

Ягримт мүйлын хотал олыс



Ягрим павыл Хальўс районт шар яныг павлыг олы, тот сат сотыра арыгкем элумхолас олэгыт. Павлың мир пуссын «Ўринэква хотал» янытлаңкве яныгполь этпос сатыт хоталэт вобыглавёсыт. Та хоталэт 500 арыгкем хотпат мүйлуңкве тув ёхталасыт.

Ты элы-палт Ягримт олнэ маньщи, ханты махум «Ўринэква хотал» янытлаңкве танки туп акван-атхатыгласыт. Нэ хотпат нявраманыл ёт пасан вэруңкве ос пурлахтаңкве Ягрим ляпат олнэ вөрн ялантасыт. Ань ты хо-

тал округувт касың павылт янытлаве ос мүй махум тув вобыглавет. Сосса махум центрыт рупитан хотпат Ягрим павылт олнэ мир магсыл «Ўринэква хотал» ань ос вэрыглэгыт.

Ты тал нила этпос сыс Ягрим павылт 20

няврамыт самын патсыт, тан халанылт хурум маньщи манос ханты няврамыг олэгыт. Та хоталт ты няврамыт ос тан щаняныл-ащаныл янытлавёсыт ос мүйлупсал майвёсыт.

Творчество колт рупитан маньщи нэг Анастасия Шарова ос Зоя Мелентьева няврамыт ёт ялпың хоталт эргыт эргысыт ос йиквыт йиквсыт. Культура колн ялантан агиришит-пыгришит эргуңкве йиквуңкве тув ос вобыглавёсыт. Маньщи ос ханты пёс йис вэрмалит ванэ нэ хотпат Л.С. Тихонова, М.С. Вынгилева, П. С. Мони́на ос Л.М. Ашарапова концерт ос суссылтасыт. Ты юи-палт мүй махум пуссын хул исмит ос щай аюңкве пасан ватан воввёсыт.

Ялпың хотал элы-палт Ягрим павылт олнэ няврамыт магсыл «Образ птицы в сказаниях Югры» нампа касыл вэрыглавес. Агит-пыгыт катыл послум хурияныл тув кетсаныл. Ты касылт нөх-патум няврамыт рупатаныл «Ўринэква хотал» янытлан порат суссылтавёсыт.

Хум хотпат касылыл ос щепиталвёсыт, тан салың сун ұлтта поргысыт ос тыньщаң репыгтасыт. Нөх-патум хотпат мүйлупсал майвёсыт. Ты юи-палт мүйлын махум пуссын тор-ломт йивн нэгсалаңкве вобыглавёсыт.

Галина Вынгилева хансум потыр маньщи латңыл Людмила ТЕТКИНА хансытэ

Вөрт яныгмам ёрн хум

Павел Янчевич Айваседа Нижневартковский район Варьёган павыл ляпат ёрн щёмьят самын патыс. Ань ты тал туй порат тав нёлсат нупыл нёлов талэ төвлы.

Тан колтаглыл вөрт олсыт. Пыг маньтагыл салыт урим, вораим ос хул алыщлым яныгмас. Ам тав ётэ Мегион ус ляпат олнэ «Югра» нампа ушлахтын мат хонтхатыгласум. Яныгпала ойка такви олупсатэ урыл мощ потыртас.

Павел Варьёган павыл школан ялантас. Овил классын ёхтуме порат руш латңыл потыртаңкве шар ат хасыс. Тыммагыс яныг пумашипа тав учитель хотпатн лавыс. Тананыл ань тыг мус пуссын ёмщакв номиянэ.

Сартын ёрн махум руш латңыл сака люльсаң потыртасыт. Атятэ Тянча наме олыс. Хунь Павел самын патыс, атятэ наме щирыл Янчевич хасвес. Овил буква хот-тыпылтавес. Та пасныл тох ты лававе.

Павыл урыл

Варьёган павыл 1900 талт олмыгтавес. Тот ань хотсат арыгтем элумхолас олы, савыңпалэ хантыт ос ёрныт. Павыл Нижневартовск усныл китсат арыгтем вёрыстат унлы. Тот Аган я овты. Мир туй порат пуссын тот ушлахтэгыт. Сосса махум та ят сорт, хулюмхул, касэв, сымри ос шапак хул алыщлэгыт.



П. Я. Айваседа

Павланыл мувлахи нефтяникыт ма-воё маныл нох-вуим рупитэгыт. Тан вөрт олнэ сосса махумн мощ нётэгыт. Тот няврамыт ханищтан магыс школа рупиты. Павылт пүльница, тэрпи тыналан кол, агит-пыгыт каснэ вәрмалын ханищтан кол, пёс пормасыт атнэ кол ос клуб олы.

Армиян ялыс

Хум маньлат порат өвлэт нор яктым рупитас. Тувыл Ханты-Мансийск ус училищан механизаторыг ханищтахтуңкве ми нас. Астламе юи-палт юн мощ олыс ос армиян вуйвес. Тав наиңхапыл яласым, ма ургалым нила тал лусытас. Щарщит яласас, мот хон мат олыглас. Тувыл лусытан маныл астыс, юв кётвес. Та порат юн рутанэн ос военкоматыт рупитан хотпатн хот-тыпыл-

тавес. Тав колэ мус маткем та йис. Салтат маснутыл ос патинкал юи-өвил хус вёрыста төва мат санспуңк пасыл витыт унсым тох та ёмыс. Олнэ матэ мус этпоскем минас. Юв ёхтыс, рутанэ пуссын хот-щягтсыт.

Маштыр хум

Павел Янчевич 1990 талытт «Югра» нампа ушлахтын мат Поссенлор түр ватат музей магыс ампарыт, сүмьяхыт ос мот савсыр колыт унттуңкве нётыс. Тав ханты маньхапыт маштырыг вәри. Тамле хап вәрнэ магыс туга хапка йив виве. Емас йив союм ватат кинсаве. Хап вәрнэ хотпа ты йив кататэтыл ултта сынумтаңкве вос вөрмитэ, тонт тав мак эрнэ паңхвитыг та паты. Хапка йиве ёңхтагтым ул вос олыс, тара уральтаве, тувыл уш ёл-яктаве. Хап кивре саграпыл вөвтаг саграве.



Экваг-ойкаг люляхолэг

Маньнув хап вас патлуптан ос хулуп унттын магыс, яныгнув хап ос матыр пормас талттын магыс варава. Пёс порат ханты махум туй порат пуссын тамле хапытыл яласасыт. Тамле хап шар ат сасы.

Павел Янчевич Нижневартковский район мирколт депутатыг олыс. Тав 1987 тал пасныл сосса махумн нётмил вәрим рупитас. Ёмщакв рупитама магыс «Почётный гражданин Нижневартовского района» намыл майвес. Тән экватэнтыл ат няврам янмалтасыг. Тав павылт пенсия-олн вуим олы. Ялпың хоталыт олыглан порат ты маштыр хум акваг-вөвиньталаве. Тав маньлат махумн акваг мөйтыт мөйты ос амщит амщи. Ты ханты хум пёс потранэ хунтуңкве сака пумыщ. Тамле ты емас хотпа Варьёган павылт олы.

Николай МЕРОВ

СОССА МИР КУЛЬТУРА

Түйтныл ос лүптаныл үйрищит вәрсыт



Үринэква ййкви, нэт эргегыт



Хотыют ёрнувег блы

Түяг ёмтыс ос хантыт, мәнщицт «Үринэква хотал» янытлан пораныл ёхтыс. Яныгпольш этпос сатыт хоталэт мән сосса махманув «Үринэква хотал» ос пёрнапос пиннэ мирыт Благовещение ялпың хотал янытлэгыт. Ханты-Мансийск үст өлнэ махманув «Торум Маа» намба музей вөр халт үнлын урн вөвиньтәлвесыт, ань тув сәв мир акван-атхатыглас.

Ты ялпың хотал такем ёмас ос малтып хоталыг блыс, тув сәв щёмьят мүйлуңке ёхталасыт. Музейт рүпитан хотпат тән магсыланыл сырсыр ёнгилыт, касылыт щёпитәлсыт, атың солапат ос лүптаң щай пайтсыт, атың нянь вәрсыт. Тот әгирищит-

пыгрищит түйтныл ман матыр лүптаныл, пластилиныл, нэпакныл сәвсыр үйрищ хурит вәрсыт, уринэква хури пөслысыт.

Ты вәрмалянылт тән тәнки халанылт кассыт ос ётыл мүйлупсал майвёсыт. Акв коланыл кина суссылтан щи-

рыл вәрсаныл, тот сосса мирыт бвылыт пөслым мультфильм суссытавес.

Мүй махум элы-пәлт «Ёмвош ёх» намтым ханты нёквет эргысыт ос ййквсыт. Тувыл «Хотал» намба Ас-угорский махум театрыт рүпитан хотпат пумыщ ёнгилыт суссылтасыт. Тот Леонид Архипов мөйт мөйтис, няврамыт магыс амщит амщис, тавён Үринэкваг масхатым әги Мария Гришкина нётыс.

Ялпың хотал оигпам элы-пәлт музейт рүпитан нә Раиса Решетникова Тяк-Аквув нупыл пөикщас. Ты

пёс нак урыл тав Нас-та апгён потыртас ос таве Тяк-Аквув үргалаңкве ханищтастә, ты халт тув атхатам хотпатн пуссын матыр эрнэ накыт суссылтас.

Тувыл мүй махум пасан вәтан вөввёсыт ос атың тәнутыл тытувёсыт. Махум потраныл хунтлысанум, тән сака щәгтым өлсыт, щәнит-әщит нявраманыл ёт тот ёмщакв үщлахтасыт. Яныгпәла хотпат сыс-там лылыёпыл лылтсыт, сосса махум ёт румалахтасыт, пумыщ концерт суссыт.

«Үринэква хотал» округувт сәв мәтт янытлавес. Белоярский үст тамле ялпың хотал «Увас хурамат» намба эргын ос ййквнэ нэт вәрыгләлсыт. Тән үст өлнэ махум магыс ос сәвсыр касылыт, суссылтапыт щёпитәлсыт. Алпыл тән няньныл үйрищ хурит вәрсыт ос махум щәил, пилвитыл айтсаныл, нянил тыттысаныл.

«Үринэква хоталув» сәв мирн вәве, ос тән мән ётув таве ос үрияныл.



Р.Г. Решетникова Наста апге ёт



Түйтныл үйрищ вәрёгыт

Тамара
МЕРОВА

ПАВЛЫҢ МИР ӨЛУПСА

Вөраян хумыт нёрытыт яласэгыт



Андрей Самбиндалов



Алексей Самбиндалов

Нёрыт ляпат Түрвāt павылт Нмāньщи щёмья Савва ос Татьяна Самбиндаловыг нйвраманэн ос апганэн ёт өлэг. Мāн тāн ураныл газетат сāv щёс хансыглāлсүв. Ань ты колтāгыл өлупсаныл хумлег олы, хумыг Андрей ос Алексей мощ потыртасыг.

Түрвāt павылт нила пыг Олег, Илья, Андрей ос Алексей Самбиндаловыт вөраим өлэгыт. Тэлы порат вөрүй алыщлым яласэгыт. Нёхс пувёгыт, сөрп катын-патталэгыт. Тāн ётаныл тот ййгирищаныл Ирина олы, тав кит нйврам оныщи. Мāнь пыге Никита тав ётэ вөрпавылт яныгми. Яныгнуб

агитэ Кристина ань Няхщамволь павылт школат ханищтахты. Туи ўщлахтын порат ущ Түрвāt павылыт тотыглаве.

Ань тāн павылт интернет оныщегыт. Сартын тот марщумнуб олыс, ань өлупсаныл пүмщицг ёмтыс. Тāн вāнэ хөтпаныл ёт ты ут хосыт акваг потыртэгыт. Колалат «спутни-

ковый тарелка» тагасыт, юн сāvсыр кина сунсэгыт, ань мā янытыл өлнэ ляххалыт пуссын вāганыл.

Алексей ос Андрей ты тал сāv нёхыс алыгасыт ос эл тыналасанэн. Андрей ты тўяг мощ вөр сāлы алыщлас. Нёвлянэ Полуночный павылыт тыналасанэ. Мōлалнуб «Бураныл» тув алыс.

Тāн палтаныл хотаңыт яныгполь ётпост ёхтысыт. Ты нётнэ товылўйит ат пātлуптыяныл, ўргалым оныщияныл. Ань хумыт вās ўруңкве щёпитахтэгыт.

Кāсың тўяг Түрвāt нампа тўрн ялантэгыт. Ты яныг тўрт хўлпыт ўнтталэгыт. Тот сорт, хулюмхўл, кāсэв, сымри алыщлэгыт.

Сартын тāн Ямал мāныл сāv сāлыл ёвтыглавёсыт. Тувыл тōват ювле оясыт. Мōтаныт ос мāколыңойкан манос сāлыпурнэўин алвёсыт. Мōлты тал ат сāлы иң олыс. Ань пуссын холасыт. Воссыг сāлыт оныщункве ат кāсашчегыт.

Вөраим ос хўл алыщлым өлэгыт. Ты коныпал тāн туристыг нёрн тотыглэгыт. Ты хосыт ос мощ оln сэлэгыт.

Ты кārкам ос ёмас сымың мāньщи хумыт нэкет кинсэгыт. Агит, нāн ты хумыт ёт ворт олўкве кāсашчегын ке, тāн наманыл интернет хосыт хөнтэн ос потыртэн. Тāн яныг щāгтыл нāн ётын вāйхатуңкв патэгыт.



Түрвāt павылт



Кумхўл

Николай
МЕРОВ

Лўимā сэрипос
(Северная заря)
№8 (1194), 18.04.2019
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция
Врио директора –
Кондина Г.Р.
Телефон (3467) 33-22-72
Заместитель гл.редактора –
Кондина Г.Р.
Телефон (3467) 33-22-72
Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52
E-mail: gazeta@khanty-yasang.ru
Газета размещена на сайте
www.khanty-yasang.ru
Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы **04399, 54399**
Тираж **1710** экз.
Заказ **1642**
Цена свободная
Мнение авторов
публикаций не
обязательно отражает
точку зрения редакции.
Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.